



UKA 2021/80

UPA 2022/80

9. august 2021

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

**Eqqakkat plastikkiusut atoqqinneqarsinnaanngornissaannik, sanaartornikkullu atorneqarsinnaanngortinnissaannik periarfissat suunersut pillugu Naalackersuisut UKA2022-mut agguaassassamik nassuiaasioqqullugit Inatsisartut aalajangiiffigisassaattut siunnersuut. Nassuiaammi pisortat namminersortullu suleqatigiissutigisinnaat, aningaasartuutaasinnaasut, inatsisitigut suut allannguutaasariaqarnersut, allatigullu tapeeriaatsikkut periarfissiisinaanissaq minguinnerusumut ikaarsaariarnissamullu iliuusissat qulaajarneqassapput, kiisalu immikkoortiterinermut atortorissaarutit allallu sanaartugassaasariaqarnersut ilanngunneqassapput.**

(Inatsisartunut ilaasorta q Aqqalu C. Jerimiassen, Atassut)

### **Tungavilersuut**

Atoqqiisarnerit suugaluarnersunik nunatsinni pikkoriffiginerulertariaqarpagut

Suut tamaasa atoriikkagut eqqarpagut, suut tamaasa atoriikkagut sumut allatut iluaqutigineqarsinnaaneri eqqarsaatigeqqaarnagit eqqaavimmuut ataasiinnarmuut eqqarpagut, suuneri immikkoorteqqaarnagit.

Plastik ukiuni kingullerni ajortuinnartut taakkaartorneqakkajuppoq, avatagiisitsinnut qanoq mingutsitsitiginera taakkartorneqartuarpoq. Illuanulli saatillugu pisinnaavarput; uagununa atuisarnitsigut atoqqiisarnermullu pikkorlunnerujussuatsigut pinngortitarpud plastikkinik mingutserippud.

Ilaatigut oqartoqartarpoq, plastik 1907-imi nassaarineqarsimanngitsuuppat nunarsuarput orpeerutereersimassagaluarpat, pappialammi atorneqarneri qaffasereeqisut, atoqqinneqarniartarnermikkullu sulii amingangaartumik inissisimatillugit, orpiillu iltimut anersaartuutigisatsinnik pilersitsisuusut sulii killorneqarneruneratigut, nunarsuatta silaannaqarnera anersaartuutigisatsinnik innarlerujussuarneqarsinnaammat.

Assersuutigilaaanni iggavimmi atortorissaaruterpassuagut, meeqqatta pinnguaat, mobiligut, computerigut, kaffikanningut, ila sorpassuillu qisuinnaq atorlugu sananeqarniartarsimangaluarpata ullumikkut killiffippit allarlunnarmiissimassagaluarpat.



Esani A/S asuliinnaq nunatsinni pilersitaangilaq, atorluangassaraarput suli annerungaartumik. Eqqangassat ikuallatassat angumatsinniartarneri ajornakusoortillugit plastikkit atoqqinneqarsinnaalluartut immikkoortitserneqartarneri aallartilluarneqarsinnaapput.

Uanilu pivara, plastik sanaartornermi atorluarneqarsinnaanerusariaqalermat, assersuutitullu uani taasinnaavara Kenya-mi Gjenge Makers Ltd ukioq 2020 Afrikami suliffeqarfinni nutaajusuni nersornaammik pinnammatt. Suliffeqarfiup taassumap suliarai plastikkerpassuit Nairobiimi ullormut eqqarneqaannartartut katersoriarlugit blokkiliarisaramikkitt cement orpilluunniit atunngikkaluarlugu, cementimiik oqinneralaarsuupput mattoqalutilli.

Maanna inissameerunerujussuup oqussuullu annertungaartumik eqqornerlueqqaffiani eqqarsaasersorluarnitsigut, akikinnerusumik, oqinnerusumik eqaannerusumillu iliortariaqaleqqavugut.

Ikuallaaviimmi Esani A/S-imik ingerlanneqartut suleqatigilluarneratigut eqqakkat plastikkiusut ikuallaaviit kissartuliai atorlugit aatsinnerisigut, nukissiuutillu ataavartut pingeriikkatta nukiit sippuinik atortorissaarutinik plastikkit naqittarlugit blokkiliarinerisigut, sinerissami sanaartornissamut atorluarneqarsinnaalissaqimmata. Cement blokkiniik oqinnerungaarput, taamaalillutillu assartorniarnerritaaq cementinut naleqqiullugit akikinnerussalluttitaaq, maanna soorlu aqqusinikkut angallannermi inunnut pisuffissiasat sf-sten-inik pilersorneqartartut assinganittaaq plastikkikunik blokkilianik pilerneqarsinnaalissammatattaq, sinerissamummi inoqarfiit minnerumaanut qiviaraanni aqquserngit inuit pisuttarfiinik annerusumik soqanngillat sanaartorsinnaanerup akisuallaartarnera pillugu.

Siunissarlu ungasinnerusoq igingalugu, nunatsinni inuussutissarsiornikkut tamanut kivitsilluarsinnaasuunissaa periarfissagissaarpoq. Tassami namminersortut eqaannerusumik, akikinnerusumik sukkanerusumillu sanaartornissamut atortussaminnik pissarsisimnaalerunik inerititaqarlualissapput, sinerissamilu sanaartorneq inoqarfinni sorliungaluarnersuniluunniit sukkanerusumissaaq ingerlalissammata. Taamaalillutalu sinerissap ilaaniik tusartuagarput, sanaartortoqannginnetanik ineriartortitsisoqannginneranillu nipi qaangiukkiartulissangaluarimat.

Inuaqatigiittut tamatta akisussaaffeqarpugut pinngortitarput paarilluassallugu, maannali maangaannaq eqqaanerujussuaq annertoqaaq. Inersimasut nalunngiivikkaluarlugu eqqakkatik pinngortitap arrortissinnaanngikkai taamaaliortuarput, soormita? Sunaana tassani kukkusimagipput? Immaqa pikkorluppallaarsimavugut ukiuni ukunani suna tamaat eqqaavimmut ataasiinnarmut eqqartuarnerani atoqqiisoqarnissaanik siunertartaqannginnerannik?

Atoqqiisalernerup kinguneranik, plastikkit sorliungaluarnersut maanna sodavandit puukuisa utertinneqartarnerannituulli Esani A/S suleqatingalugu aaqqiissusiorsinnaanngaanni nunarsuarmi nunani eqqilunnerpaanut ilanngussinnaangatta, naak plastikkinik inerteqquteqanngikkaluarluta.

**Aningaasatigut ingerlatsinikkullu pisortanut kingunerisassai:**



Nalunaarusiornissamut piffissaq atorneqartussa q ukiup ilivitsup iluaniissinnaanissaa naatsorsuutigineqassaaq. AC-fuldmægtigellu ukiup ataatsip sulineratut naleqassalluni 500.000kr.

**Namminersortunut aningaasarsiornikkut allaffissornikkullu kingunerisassai:**

Soqanngilaq.

**Innuttaasunut aningaasarsiornikkut allaffissornikkullu kingunerisassai:**

Soqanngilaq.